

CUNTRATU CUN IS SARDAS E CUN IS SARDUS

Deu, chi seu candidada/au a is eletzionis provintzialis de Aristanis de su 30 de maju de su 2010, asseguru a is sardas e a is sardus chi apu a traballai po una polìtica linguìstica de profetu, po fai su bilinguismu in Sardìnnia.

Custu bolit nai ca:

1. Apu a difendi e apu a afortiai sa Norma Campidanesa de su Sardu Standard, chi su Consillu Provintziali de Casteddu at aprovau a totòmini su 16 de martzu de su 2010. Imparis, apu a difendi e apu a afortiai una norma logudoresa de su Sardu Standard, chi su Consillu Provintziali de Aristanis at a fai. Custu ca sa Provìntzia de Aristanis, sendi su logu de s'Urrennu de Arbarei e sendi su logu chi pigat toteduas is bariedadis, tenit sa faina stòrica de difendi totu su Sardu, cun duas bariedadis ofitzialis, campidanesu literàriu (su de sa Norma chi eus nau) e logudoresu literàriu.
2. Sa Provìntzia de Aristanis at a imperai su campidanesu literàriu e su logudoresu literàriu, ca torrante a is bariedadis naturalis suas, e su pròpiu s'Arregioni depit imperai impari campidanesu literàriu e logudoresu literàriu, cun su pròpiu documentu scrittu in ambaduas bariedadis, o puru a muda, imperendi ses mesis su campidanesu e ses mesis su logudoresu.
3. Is atzionis politicas po lompi a custa tenta ddas apu a apariciari cun s'agiudu de s'Acadèmia de su Sardu, fundada su 19 de mesi de idas de su 2008 de is mellus oberadoris de lingua sarda, campidanesus e logudoresus impari, cun sa consulèntzia scientifica de Eduardo Blasco Ferrer su professori.
4. Apu a fai custu traballu mancai sciendi chi àterus politicus de su partidu miu no funt diacòrdiu, ma ddu apu a fai su pròpiu ca po mei benint innantis is deretus de is sardas e de is sardus.
5. Abarru pronta/u a agiudai, de sa manera chi potzu, s'Acadèmia de su Sardu chi eus nau, dònna borta chi custa at a pregontai.
6. Abarru prontu a pigai parti a is cunferèntzias de politicus po is duas bariedadis chi s'Acadèmia de su Sardu at a apariciari.

Seu po chi sa Provìntzia de Aristanis e s'Arregioni imperit ambaduas bariedadis, de manera ofitziali ca:

1. Totu is sardas e is sardus depint essi arrapresentaus, cun is bariedadis naturalis insoru, su campidanesu, chi s'agatat scrittu giai de su 1089

(Carta Calaritana) e su logudoresu, chi s'agatat scritu giai de su 1113 (donu de Santu Nigola de Trullas).

2. Is liburus antigus e modernus chi spricant sa gramàtica insoru funt medas. Totus cumprendint s'una o s'àtera o ambaduas puru. Sa literadura scritta est giai totu in campidanesu o in logudoresu, no s'agatat una literadura in Limba Sarda Comuna.
3. Sa poesia a bolu, o cantu de sei, est sèmpiri in campidanesu o in logudoresu, no s'agatat cantadas in Limba Sarda Comuna. Custu amostat cramenti ca is sardas e is sardus ant giai uniu de manera naturali is fueddadas de is biddas insoru, pinnighendi-ddas in custas duas grandus bariedadis. Su tenore de Orgòsolo cantat in logudoresu, no in orgolesu (e prus pagu chi mai in Limba Sarda Comuna) e su cantadori de Sinnia cantat in campidanesu e no in sinniesu (e prus pagu chi mai in Limba Sarda Comuna).
4. In totu su Mundu is istituzionis su prus de is bortas sceberant sa bariedadi chistionada de prus (cumentis ant fatu in Catalùnnia pighendi sa bariedadi de Barcellona o in Fràntzia pighendi sa bariedadi de Parigi) o sa cun prus literadura scritta. In Sardìnnia sa literadura scritta est meda in ambaduas bariedadis, e su campidanesu est sa bariedadi de su logu prus populau.
5. In totu su Mundu funt meda is logus chi is istituzionis ant sceberau po ddas imperai de manera ofitziali duas bariedadis de sa pròpiu lingua o finsas duas lìnguas diferentis. Aici est in Svìtzera, in Norvègia e in Logus Ladinus.
6. Sa Limba Sarda Comuna est una bariedadi no beni crara, est traballoosa ca no fait a a dda imparai chistionendi ca no dda chistionant in nisciunu logu, no fait a dda imparai nimancu ligendi e scriendi ca no tenit literadura ni gramàticas ni ditzionàrius.

Dongu su permissu a s'Acadèmia de su Sardu de fai sciri a totus e de calisiat manera chi deo apu firmau custu cuntratu, de manera chi is sardas e is sardus scìpiant chini est a sa parti insoru.